

Guangjshih Minzcuz Bau

ganhhau: CN45-0036 B.2016 Nd.4 Ng.20 liggaueq bingjsaen nienz ndwensam cibseiq

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3220期

Swcigih Minzveij Iucingj Conhgyah Mizmingz Baekging Vih Dajcaux “Sam Nyied Sam Bouxcuengh” Vwnzva Binjbaiz Ok Geiqmaeuz

自治区民委特邀北京著名专家为打造“壮族三月三”文化品牌出谋划策

Bonjbau siusik (gicej Couh Yi)
Vih dajcaux gih raeuz “sam nyied sam Bouxcuengh” vwnzva binjbaiz ok geiqmaeuz, Swcigih Minzveij bineix baez daih’it iucingj seiq boux conhgyah mizmingz—Cunghyangh Minzcuz Dayoz Yungz Gunhsinh、Yenz Ging gyausou, Baekging Dayoz Lij Gihingh gyausou, Cunghgoz Yinzminz Dayoz Hoz Hujswnggh gyausou, daj 4 nyied 9 daengz 11 hauh, seiq boux conhgyah bae daengz Namzningz、Vujmingz、Cungzcoj、Ningzmingz、Bingzsiengz daengj 5 aen si yen, camgya le geij aen hozdung; Vujmingz “sam nyied sam Bouxcuengh” gaihmysiz、Guengjsae Minzcuz Cunghconh ndawhag “sam nyied sam Bouxcuengh” hozdung、Cungzcoj Si “sam nyied sam Bouxcuengh” hozdung、Ningzmingz Yen Yacouh Cunh ciengj bauqva hozdung, caemhcaiq yawjngonz le aen mbanj miz saujsu minzcuz daegsae Bingzsiengz Si Mbanjbanjsiuj.

Lij Gihingh gyausou ceijok,

Guengjsae “sam nyied sam Bouxcuengh” hozdung gig miz deihfueng minzcuz daegsae, gij rengzietcomz caeuq ganjyenjliz minzsuz hozdung yienh’ok haenx gig yinx vunz. Haiguh “sam nyied sam” hozdung, aeu laebdin gaem ndei minzcuz daegsae, yungh gij fuengsik sonhag yungzhaeuj guh’angq aeu minzcuz daegsae yienh okdaeuj, hawj vunzlai camgya gij minzsuz hozdung gig miz hudungsing caeuq canhyijsing neix, leihyunggh doenghgi hozdung neix fatyiangz minzcuz cing-saenz caeuq minzcuz vwnzva. Doengz-seiz, mbouj wngdang dan youq gvaengxlaengx Guengjsae raeuz, vanzlij aeu cungj fuengsik sonhag yungzhaeuj guh’angq neix doigvangq daengz daengx guek gak dieg, gyahung gij yingjyangliz “sam nyied sam Bouxcuengh”.

Hoz Hujswnggh gyausou naeuz, “sam nyied sam Bouxcuengh” hozdung baijyienj le gij vwnzva hingzsiq caeuq gij yinxdaeuz Bouxcuengh gig daegbied,

banh “sam nyied sam Bouxcuengh” hozdung, gij muzdiz engqgya youqgaenj dwg doenggvaq cwngfuj cujiz, hawj gij minzsuz hozdung conzdungj ndaw-biengz ndaej swncienz caeuq hwngfat, yienghneix mboujdan fungfouq gij cingsaenz saedcej vunzlai, caemh ndaej daejyienh vwnzva daegsae Bouxcuengh Guengjsae, gyagiengz vunz Bouxcuengh doiq minzcuz vwnzva bonjfaenh miz nyinhdoengzgammj caeuq swhauzganj.

Yungz Gunhsinh gyausou nyinh-naeuz, laegdaeuq vatcimh gij neihanz minzcuz vwnzva, caemhcaiq doenggvaq gak cungj hingzsiq biujyienh okdaeuj, hawj daihgya itheij camgya caeuq roxnyinh, yienghneix doiq minzcuz vwnzva hwngfat miz leih, doengzseiz cei ndei ndaej aeu minzcuz vwnzva caeuq ginghci leih’ik hablex giethab haeujdaeuj, guhbaenz itdingh haw-ciengz vwnzva caeuq gveihmoz, yienghneix doiq dajcaux hozdung binjbaiz “sam nyied sam Bouxcuengh” miz leih.

SIUSIK DINJ

简讯

● Mboengqneix, Ginh-siu Yauzcuz Swciyen haiguh hong bujcaz heiqloih citheiq deihfueng. Ciuq cam rox, moix daengz angqhoh ngoenzciet, gyoengq cangh-heiq ndawbiengz aen yienh neix couh yungh Heiqguengjsae、caijdiu、Heiqcuengh daengj yisuz hingzsiq youq daizheiq lajmbanj yienj heiq.

(Cinz Haijyen Bangz Yaujvaz)

● Mboengqneix, Sanh-gyanyangh Dungcuz Swciyen ciuhai aen hoih anbaiz hong fuengzyw bingh’aiswh, cunggez faensik le gij cingz-gvang hong fuengzyw bingh-aiswh seizneix daengx yienh, anbaiz le gij hong fuengzyw bingh’aiswh baezlaeng. Bineix aen yienh neix veiswnggh bumwnz genhciz gij yenzcwz ciufap fuengzyw、gohyozy fuengzyw、yawhfuengz guh-cawj、fuengzyw giethab, nyinhcaen cujiz, roengzsim anbaiz, yungh lai cungj banhfap haeujlaeg haiguh hong fuengzgaem bingh-aiswh.

(Yiz Vanjyaz)

● Gaenh geij bi neix daeuj, Yungzsuiz Myauzcuz Swciyen gaem maenh gij cawjdaez hong minzcuz gak minzcuz doengzcaeaz doxgiet cinbu、doengzcaeaz hoengh-vuengh hwngfat, giethab ndaw yienh cingzgvang, doed ok cungdenj, gaem ndei hong cauxguh minzcuz doxgiet cinbu, baujmaenh ginghci hoenghvuengh hwngfat、minzcuz doxgiet cinbu、ndawbiengz huzndei onjdingh.

(Cinz Cunghdwz)

● Bineix daeuj, Mungz-sanh Yen mboujduenh gyalai minzswnggh gunghcwngz bued roengz ligdoh, couz ngaenz-cienz 4 ik maenz, hengzgah 12 hangh vih beksingq banh saedsaeh gunghcwngz, miz bouhloh doicaenh singzgaeuq gajcoih、hawsingz vanzging gyongjyoeb cingjceih、sicwng gingjhaemh dajrongh daengj hanghmoeg hwnjguh, mboujduenh daezsang singz yangh hwngfat binjciiz.

(Gvanh Sinh)

Youzcz Gunghcwngz Youq Yanghgangj Ndae Haengjgyaez

恭城油茶在香港受热捧

4 nyied 16 hauh, ciet vwnzva gigwn ndei “yawj sim angq gwn” youq Yanghgangj Veizdohliya Gunghyenz haimuq. Youq Guengjsae canjgih, youzcz Gunghcwngz homfwftwt angq-coux hek daeuj, cungj mbouj gaeuq gai. Ciuq cam rox, cimz le youzcz doeklaeng, Yanghgangj siminz lij ndaej doenggvaq saujsu yauz wveizmaj, soengswt hwnj-vangj cawx doxgaiq, baugvat youzcz、bingjmakndae、maklozhan daengj hauj-lai daegsae gigwn ndei Mbanjyauz. Ndaw doz dwg Yanghgangj siminz daeuj cimz youzcz Gunghcwngz.

(Liengz Veih/梁辉)



Fanh Gaem Yieng Gingqbaiz Goengcoj Bouxcuengh Baeugroxdox

万把香火虔诚拜祭壮族始祖布洛陀

4 nyied 13 hauh banhaet, bi 2016 daihdiemj caeqbaiz goengcoj Bouxcuengh Baeugroxdox youq Denzyangz Byagamjcuengh Ciuzbaiz Gvangicangz banh, Swcigih Daizban cujyin Liuz Ganj, Cungguek Sevei Gohyozyen Minzcuz Vwnzyoz Yenzgiuso fuso-cangj Yenz Gozfeih, Guengjsae Cangyoz Yozvei veicangj Cinz Caijlonz camgya caeqbaiz daihdiemj.

Ngoenzhaenx banhaet, Bouxcuengh、Buyihcuz、Suijcz、Lizcuz、

Dungcuz、Daijcz、Mulaucuz、Mauz-nanzcuz daengj 8 aen minzcuz Cuengh Dung yijhi doengzgoek doengzdae daj Guengjsae、Yinznanz、Gveicouh、Haijnanz、Daizvanh nem Daigoz daeuj haenx gungh 34 doih doihcaeqbaiz daenj buhvaq caeqbaiz, daiq gij huq caeqbaiz fungfouq、ciengq go caeqbaiz、yiemsuk caemhcaiq goenggingq mizsim dwk caeqbaiz goengcoj Bouxcuengh Baeugroxdox, gouz bi moq bingzan vuenyungz, haeuxgwn fungsou,

saehnieb swnhleih.

4 nyied 14 hauh banhaet, bak lai doih doihcaeqbaiz geij fanh boux beksingq daj Denzyangz Yen nem dieg henzgyawj daeuj haenx laebdaeb doxcomz youq Denzyangz Byagamjcuengh Ciuzbaiz Gvangicangz, caeqbaiz goengcoj Bouxcuengh Baeugroxdox, yienh’ok gij ciengzmienh sekda fanh gaem yieng gingqbaiz goengcoj.

(Vangz Yisiu/黄玉秀)